

Arrantzaleak borroka bizian itsasoan frantziarren ez-legezko sareengatik

Espainia eta Frantziako armadetako patruila untziak gatazka lekuan dira

Kantauri itsasoaren kostaldeko eta Frantziako arrantzaleak borroka bizian hasi dira berriz ere, hegaluzearen kanpainan frantziarrek ez-legezko bolanta sareak erabiltzen dituztelako. Bolanta sareak hautsi, suziri jaurtiketa eta untzien abordajeak gertatu dira itsasoan bertan.


JOSEBA AIARZA / DONOSTIA

Galiziako kostaldetik 700 mila gertatu diren istiluak «oso larriak» izan zirela jakinarazi zuten atzo Bizkaiko eta Gipuzkoako kofradietako arduradunek. Sareak hautsi, abordajeak eta suziri jaurtiketak ere izan ziren Frantziako eta Kantaurialdeko untzietako arrantzaleen artean.

Iskanbilak herenegun gauean hasi ziren, Galizia, Asturias, kantabriako eta Hego Euskal Herriko zenbait unti arauzko neurriak gainditzin dituzten bolanta sareak hausten hasi zirenean.

Frantziako zenbait untzitatik suziriak jaurtiz erantzun zuten, eta ondoren untzien arteko jarrapenak eta abordaje ahaleginak gertatu ziren. Orioko Beti San Luis untiak Frantziako Ile de Sick izenekoaren abordajea jasan zuen. Istilu hauetan ez zen zauriturik izan, arratsaldera bitartean behintzat.

Espainiako Itsas Armadak Mahon patruila unzia bidali zuen Ferroletik gatazka lekura. Ferrolgo Armadaren koartelek jakinarazi zuten, Kantauriko ehun bat unti inguratuta zeuzkaten arratsaldean Frantziako beste sei. Azken hauek Tenace



Hegoaldeko arrantzaleak «edozertarako prest» daude bolanten inguruko araudia betearazteko. IÑAKI OTXOA

izeneko patruila untiaren aldamenean kokatu ziren bertatik irteten ahal izateko, baina «Espainiako untiak galerazi egin diete maniobra hau egitea, suziriak jaurti zituen untiak ihes egin ez dezan».

Iturri berberak azaldu zuten, estatuetako armadetako untzietatik eta arrantzale kofradietatik lasaitasunerako deiak egin zituzten, eta arrantzaleei adierazi zieten gatazka konpontzeko gobernuen arteko negoziazioak hasiak zirela.

Hondarribiko kofradiako lehendakari eta sektoreko bozeramailea den Esteban Olaizolak, Frantziako Gobernu salatatu zuen berriz ere bertako arrantzaleei 2,5 kilometrotik gorako ez-legezko sareak erabiltzea ez galarazteagatik. Atzoko iskanbile-

tan, Frantziako patruila untiak ere Kantaurialdeko untziei erasotzekotan izan zirela ziurtatu zuen.

Espainiako Gobernu ere gertatutakoaren erruduntzat jo zuen Olaizolak, arazoari irtenbidea aurkitzeko nahikoa presio egiten ez duelako. Espainia eta Frantzia arteko muga ixteko eskatu zuen, Frantziako untiak harrapatutako arrainik sar ez dadin.

«Espainiako Gobernuak zein gutxi egiten duen ikusten ari gara. Frantziak arauak betetzen ez baditu, Espainiak ere ez ditzala bete eskatzen dugu, mugak itxi eta frantses arrainik gurera irteten utzi ez dezala», azaldu zuen.

«Behin eta berriro salatu dugun arren, berdin jarraitzen dutela ikusten dugu, behar baino

sare handiagoak erabiltzen inork galerazi gabe» gehitu zuen, eta gertakizun «oso larria» jazotzeko arriskua ere bazegoela ohararazi zuen, «arrantzaleak Europako arauak betearazteko edozertarako prest» daudelako.

Kantaurialdeko komunitate guztietako armadoreak Donostian bilduko dira bihar. Gizarte Segurantzako kuotak ordaintzeari uko egiteko proposamena eztabaidatuko dute, besteak beste, arrantzaleen ordezkariak, Espainiako Administrazioaren erantzukizun ezaren aurrean.

Kantauri kostako 300 unti inguru ari dira hegaluzearen kostean une honetan, horietatik 200 Bizkaia eta Gipuzkoakoak. Atzoko liskarren ondorioz, baliteke unti hauek datozen orduean porturatzea.

BILBOKO

BURTSA

Giroa onera aldatzen ari da


IBON ALONSO / BILBO

Nahiz eta aste hasieran EAEko merkatuan mesfidantza nagusitu, azken ekitaldietan portaera positiboa sumatu da, batez ere bonoen prezioek izandako berreskurapenak (Alemaniako agiriakiko diferentziala murrizteko) bultzatuta. Inbertsoreak mesfidantzatik baikortasunera pasatu dira eta KPI adierazlearen ekaineko emaitzak (% 0,1eko inflazioa) balore merkatuetako igoerak erabat tajutu zituen.

Bestalde, dolarraren azken trukeak diru horren berreskura-

pena bidean dagoela adierazten badu ere, adituen ustez dolarren etorkizuna ez dago oso argi: nahiz eta hainbat datuk EEBBeko inflazioa kontrolpean dagoela azaldu, baliteke datozen egunotan dolarren kotizazioa oraindik zerbait jaistea.

Altxor Publikoak iragan asteazkenean egindako enkantean urtebeteko letren errentagarritasuna % 8,20ra igo zuen. Kontuan izan behar da epe luzearen ondoren mozketen bigarren igoera dela honako hau. Espainiako Bankuak berriz, gordailu agiriaren enkantean diruaren prezioa



% 7,5ean uztea erabaki zuen.

Datu hauek Espainiako burtsen portaera kanpoko merkatuen mende ez egotea eragin dute eta inbertsoreek bertako datuekin jokatzeko erraztu ere.

Egia esan errenta aldakorrek merkatua lasai aritu izan da azken ekitaldietan eta kontratazio

bolumena handitu egin ere. Azpimarratu beharra dago etorkizun eta aukera kontratuek ostiralean bete zuten epe mugak negoziaketa maila handitzea bultzatu zuela: ostiralean 40.000 milioi pezeta negoziatu ziren, aurreko ekitaldietan tartekatutako den bikoitza, alegia.

Gobernuak «ekintza bortitzik» ez egiteko eskatu die arrantzaleei

J.A. / DONOSTIA

Jose Loira Espainiako Arrantza alorreko idazkariak «ekintza bortitzik ez egiteko» eskatu zien atzo hegaluzearen kostean ari diren arrantzale espainiarrei.

Loirak egiaztatu zuen Madril eta Parisko gobernuen arteko harremanak hasiak direla arazoari irtenbidea emateko. Luis Atienza alorreko ministro espainiarrak «kezka agertu dio alor bereko arduradun frantziarrei», Loiraren arabera, eta «datorren astelehenean bilduko dira Bruselan arazoa aztertzeko».


Bitartean, Gobernuak ordezkaria arrantzale kofradiekin eta gobernu autonomoetako arduradunekin harremanetan jarri da eta lasaitasuna gordetzea aholkatu du, eta Bruselako eta Parisko agintariei legedia betearaz dezaten eskatu die.

Sektoreko iturriek EGUNKARIARI azaldu ziotenez, ez litzateke komenigarria euskal arrantzaleen interesetarako Frantziako untziei edo arrantzaleei inolako kalterik egitea, horrek «nazioarteko iritzia gure kontra jartzea ekar lezakeelako, eta orain gure alde dugu». Hala ere, aitortu zuten urtero eta kanpainia bakoitzean errepikatzen diren arazoen «tentsioa handitu eta azkenean egoera lehortarazi egiten dutela».

Antzeko liskarrak gertatu dira aurten bertan, bokartaren kanpainian, Frantziako eta Ipar Euskal Herriko pelagiakoak beren kuota beteta eta sasoz kanpo antxoaren arrantzan ibili zirenean.

Hegoaldeko eta Kantaurialdeko arrantzaleentzat ezinbestekoa da sare pelagikoaren erabilpena mugatzea eta, bolanten kasuan, debekatzea, beraiek erabiltzen dituzten ohizko arrantza tresnekin bateraezinak direlako, hau da, frantsesak arrantzan dabilzan lekuan, euskaldunek ez dute ibiltzerik.

LANBROA



kafetegia
edaritegia

konstituzio
plaza 5
if.: 42 19 58
DONOSTIA